

欽定剿平粵匪方略

欽定剿平粵匪方略卷四百十五

附設立長江水師章程

咸豐十一年十二月初三日掌山東道監察御史薛春黎奏言安徽所屬八府南則徽甯池太北則安廬鳳潁而安慶一府雄踞江口對瞰徽池皖南諸郡足以控制前人於此建立省會意至深遠自咸豐三年賊匪攻陷安慶後大股卽

全趨金陵安慶城池並無賊踞周天爵李嘉端等奏請改建省會於廬州棄安慶而不顧至三年七月間賊蹤游駛窺我無備漸圖占踞蠶食各屬駭駭乎分陷舒廬旁擾徽甯全皖遂至糜爛查安慶府城一面枕山三面濱江上有大小孤下有東西梁實扼中流關鍵且居吳楚之交又爲楚鄂江右門戶長江千里古稱天塹上游

若武昌九江下游若金陵鎮江均稱重鎮安慶
屹立其中首尾相應若省會改於廬州則僻處
皖北一隅非惟皖南一帶鞭長莫及且距江較
遠無從設防所以年來賊艘來往自如屢次上
竄以至武昌屢陷江右騷然肩亡齒寒均由自
撤藩籬未得形勝故也幸楊載福等舟師順流
直下扼要堵截故楚北漸次肅清安慶亦報克

復軍威丕振此其明驗相應請

旨飭將安徽省城仍建於安慶府巡撫藩臬等官如
前駐紮以循舊制但地利固不可不講武備尤
不可不修安徽提督向係巡撫兼銜皖北僅設
壽春一鎮兵力較單或因

國家承平地處腹內無須重兵鎮守然以今視昔
迥乎不侔故皖南因軍務緊急已添設總兵一

員統籌全局似宜添設提督大員統轄水陸各營節制南北二鎮以資彈壓安徽江西向歸兩江總督兼轄而江西之九江府與安慶相爲犄角地勢切近請將九江一鎮就近歸安徽新設提督節制聲勢更爲聯絡江防更爲周密似此層層布置賊舟斷難泝流上竄不但保安徽亦以保江右楚北二省也至設官必須添兵添兵

必須增餉查福建廣東兩省均設水陸提督各一員所以重海防也但以時勢論之則今日江防較海防尤爲喫重可否於該二省內裁併一缺移設安慶則兵餉無須另籌而地方實大有裨益奏入

上命議政王軍機大臣傳諭曾國藩彭玉麟毓科曰賊匪踞有長江之險以致江皖糜爛現在安慶克

復亟應整頓江防薛春黎所稱安徽省城仍應建
於安慶巡撫藩臬如前駐紮並設立提督統轄水
陸官兵九江鎮併歸節制等語不爲無見卽著曾
國藩彭玉麟毓科就現在地方軍務情形悉心籌
畫會同妥議具奏

同治元年二月二十四日協辦大學士兩江總
督曾國藩奏冒查安徽一省跨乎大江江以北

四府四州江以南四府一州安慶府城據濱江
適中之地實爲形勢所必爭咸豐三年安慶城
陷江面悉爲賊有千艘往來飄忽莫測官軍無
一舟一筏可以應敵周天爵等請以省城改建
廬州係屬一時權宜之策現在安慶已復江路
疏通欲辦蘇浙之賊必自力圖皖南始欲辦皖
南之賊必自守定安慶始是安徽省城仍應建

於安慶巡撫藩臬如前駐紮庶足以資控制而
一事權水師陸兵判然兩途安徽壽春鎮所轄
向係羣捻出沒之地皖南鎮所轄又係萬山叢
雜之區皆與江防毫不相涉應請仍歸安徽巡
撫節制江西九江鎮所轄如撫州建昌等處雖
大江六七百里亦係陸路專政應請仍歸江西
巡撫節制該兩省巡撫向兼提督銜均應遵守

舊章無庸更改至江防局面宏遠事理重大應請專設長江水師提督一員目下大江水師歸彭玉麟楊載福等統率者船隻至一千餘號噸位約二三千尊實賴逐年積累成此巨觀將來事定之後利器不宜浪拋勁旅不宜裁撤必須添設額缺若干安插此項水師以固江防其提督衙門或立安慶或立蕪湖等處自提督而下

總兵應設幾缺副參以至千把各設幾缺暨分
汛修艦各事宜統候

諭旨允准之日再由吏兵等部詳覈議奏臣等如有
所見亦必續行奏咨略參末議至俸薪口糧修
補船廠等項當於長江酌留釐卡數處量入爲
出不必另由戶部籌款其福建廣東原設水師
提督似不必遽議裁缺轉致疏防奏入

上諭內閣曰曾國藩奏遵議安徽省城仍建安慶專
設長江水師提督及總兵以下各官著議政王軍
機大臣會同該部議奏

五月二十三日議政王軍機大臣吏部戶部兵
部工部會奏言查安慶古之皖國西控楚鄂南
臨江表在昔季漢已爲吳魏必爭要地降及唐
宋下逮元明悉爲重鎮咸豐三年失陷後省城

暫建廬州並將甯池太廣道暫改爲徽甯池太
廣道加按察使銜專摺具奏稍重其權以爲權
宜之計今安慶克復江路疏通曾國藩請將省
城仍移建安慶查該處地據形勝實足以資控
制應如所請悉復舊制全省一切事務仍由該
督撫奏報庶事權得以歸一號令不致紛歧其
按察使銜徽甯池太廣道應否仍復舊制之處

由該督察看情形另行具奏安徽省所轄長江
上接江西之九江下連江南之江甯其開江而
遼闊地勢險要防守皆爲重地今該督奏請添
設長江水師提督一員深得古人欲固東南必
先守江之意應如所請准其添設其駐紮地方
安徽省城旣仍改建安慶巡撫藩臬如前駐紮
則采石等處之險亦須有重兵駐守方足以資

聯絡提督衙門自應設立蕪湖至總兵副參以
至千把應設幾缺暨分汛修艦各事宜請仍令
該督親歷沿江地方體察情形熟籌妥議此項
水師無事則泛舟長江往來巡察有事則東西
奮擊戰守兼資惟添設提鎮大員該督須爲經
久之計其將領應如何選擇兵丁應如何練習
須詳細籌畫勿因目前有彭玉麟楊載福統帶

楚勇數千卽定爲規制應令該督再行詳覈議
奏至酌添長江水師提鎮官弁需用俸薪口糧
若干長江酌留釐卡數處量入爲出一時權宜
則可若行之久遠旣非定制且釐卡所得贏絀
無定俸薪口糧卽從而隨多隨少亦於事理未
協應俟該督妥議添設後應支俸薪等項若干
報部覈定行文皖省由藩庫開支其長江應酌

留釐卡幾處應收釐金若干隨時報部備查所
收銀兩儘數解交藩庫備撥庶事歸畫一以符
定制至統率船隻千餘號之多現當多事之秋
實爲水師所必需應令該督等俟軍務平後將
前項船隻數目如何分隸管轄及何年製造每
船需銀若干有無編列字號分別造冊送部以
憑查覈職位一項尤係行軍利器現已約有二

三千尊足資攻勦亦應令事定後將職位名目
並斤重若干及分撥何營存留備用之處分別
造冊報部備案奏入

上從之

五年正月初四日大學士湖廣總督官文協辦
大學士兩江總督曾國藩署兩江總督江蘇巡
撫李鴻章兵部右侍郎彭玉麟奏言臣國藩於

同治元年二月請專設長江水師提督及總兵
以下各官奉

旨交軍機大臣會同該部議奏旋經吏部等議准設
立長江水師而於總兵副參以至千把應設幾
缺暨分汛修艚各事宜令臣等體察情形再行
詳覈議奏三年四月奉

旨以淮揚鎮總兵黃翼升補授長江提督之缺六月

克復金陵濱江五省戰事大定卽應將前募之水勇改爲經制之水兵覈定章程會議具奏特以勇丁之口糧較多額兵之日糧極少相去懸絕難於酌中定議輾轉籌思是以覆奏稍遲臣國藩於咸豐二年臘月初招湘勇維時長沙甫經解圍各路兵勇往來湖南絡繹不絕查發餉章程參差不齊惟張國樑之勇每月五兩四錢

江忠濬之勇每月四兩五錢該兩軍最爲著名
於時迫三年夏閒勝保奏請招募陸勇月餉四
兩五錢戶部議准江南大營循而行之遂定爲
報銷之常例臣於三年冬閒招募水陸兩軍陸
勇酌減爲每月四兩二錢而親兵什長稍有增
加水勇酌減爲每月三兩六錢而礮手柁工稍
有增加厥後銀價日賤米價日昂咸豐十一年

楊載福等請將水勇加爲每月三兩九錢至今未改臣復詳加詢訪除山東河南餉章微少外其餘江楚閩浙等十餘省勇餉均係四兩有奇目下各路招集陸勇紛紛未已若水軍驟爲大減則人皆去爲陸勇誰復願充水兵故臣所議章程於兵餉一條暫從其優俟軍務告竣再行酌量覈減審時度勢有不能不出於此者非敢

與陸勇戰守糧額故示懸殊也我

朝綠營兵丁五十餘萬乾隆四十六年議增缺額
名糧大學士阿桂會上疏力爭臣國藩亦於咸
豐元年疏請裁兵五萬戶部初未議准後乃通
行各省酌辦溯自洪楊倡亂捻回繼變軍興十
餘年惟向榮和春大營用兵稍多其餘皆倚勇
丁以集事

國家養兵之費歲逾二千萬當此多事之秋未聞
綠營立一奇功出一良將今各省勇丁合計約
在三十萬以外而昔年經制之兵仍未能議裁
議減且守戰各兵在營之坐糧雖少而出征外
省加以鹽折夫價餘丁等款每兵一名月支亦
在五兩統籌全局殊非長策臣愚以爲軍務全
竣後仍當綜覈名實裁減陸兵其必不可裁者

卽當增加口糧此又因今日設立水營而卽豫
爲異日陸營之地者也謹擬事宜三十條營制
二十四條恭呈

御覽計戰船七百七十四號除提督已頒關防外新
設總兵四員撥出兼隸之總兵一員副參遊三
項營官二十四員都守千把外委等哨官七百
七十四員兵數一萬二千餘人兵餉船價廉俸

雜費修艦之資約計每月五萬有餘又選將練
兵餉項捕務暨考覈教演之法莫不嚴定章程
冀垂令典請

旨飭下軍機大臣會同吏戶兵工等部暨總理衙門
覈議施行

長江水師事宜三十條

第一條長江水師提督駐紮原議在於蕪湖建

立衙署但蕪湖內河甚小冬令水涸不能安
泊戰艦若泊大江之中則洪濤巨浸其患莫
測查江南太平府河外通江內通湖可紮戰
船數十營右達皖南甯國府南漪固城諸湖
左達江蘇高淳溧水兩縣石臼丹陽諸湖兼
可扼東壩之要隘擬以提督駐紮太平府設
立衙署

第二條提督管轄之地上自荊州岳州下至江蘇崇明兩岸支河內湖均歸統轄計程近五千餘里分防五省若僅駐紮太平府恐其照料難周擬於岳州府設立行署該提督分月輪駐以半年駐下江太平府以半年駐上江岳州府每年周歷巡查駐上江則巡閱至洞庭湖荊州止下江則巡閱至狼山止

第三條提督統轄較遠責任甚重擬請單銜奏事以專責成如遇有與各省地方公事及陸營交涉之件則會商該省督撫分別奏咨辦理如地方公事及陸營有與水師交涉之件該省督撫亦會商長江提督分別奏咨辦理提督之官其初本係文職明末李如松始以武臣而爲提督初尙文武兼用後乃專用武

職惟九門提督一缺尙是文臣兼領江皖晉
豫等省提督之缺尙以巡撫兼領略存舊制
今長江提督一缺擬請文武兼用仍歸兩江
總督湖廣總督節制

第四條長江水師共立六標提督駐紮太平府
所轄提標五營岳州設一總兵所轄鎮標四
營漢陽設一總兵所轄鎮標四營湖口設一

總兵所轄鎮標五營瓜州設一總兵所轄鎮
標四營狼山鎮總兵兼隸長江所轄鎮標二
營通共二十四營

第五條長江水師與各省河湖交界之處應卽
畫分界限各有汛地以專責成湖北除江面
千餘里全歸長江提督外其自荊州以上泝
江至宜昌巴東漢陽以上泝漢至襄陽鄖陽

及各支河湖汊應由湖北另行設防歸湖廣
總督湖北提督統轄湖南除江面及洞庭湖
歸長江提督外其湘沅二水應由湖南另行
設防歸湖南巡撫湖南提督統轄江西除江
面及鄱陽湖歸長江提督外其吳城以上省
河及東西支河應由江西另行設防歸江西
巡撫統轄安徽除江面與傍江之湖歸長江

提督外其淮河自正陽關以下至洪澤湖止
並接連蘇屬之支河湖蕩應另設淮揚水師
歸淮揚鎮總兵統帶兩江總督漕運總督安
徽巡撫兼轄江蘇除江而歸長江提督外其
自鎮江以東凡江南之支河湖蕩應另設太
湖水師歸兩江總督江蘇巡撫江南提督統
轄其舊設海口之狼山福山蘇松三鎮除福

山蘇松二鎮悉仍其舊外擬以狼山鎮兼隸
長江提督標下仍聽兩江總督江南提督節
制

第六條副將參將遊擊各有專營自應設立衙
署惟長江水師營汛其責任專重在水面並
無防守城池彈壓市鎮之責其立汛建署須
擇有港汊內河可收泊戰艦者庶免風濤覆

溺之患雖孤洲野岸亦可修造衙署宜距城
市稍遠乃爲妥善

第七條水師官兵皆宜以船爲家不准登岸居
住如違例住岸上者官卽革職兵卽革糧自
都司以下皆係哨官卽以哨船爲辦公之所
不准建署陸居至長江提鎮除例給坐船外
各給督陣三板二號每船額設守備哨官一

員兵二十名內舵兵一名頭兵一名礮兵二
名槳兵十六名凡提鎮衙門巡捕跟丁執事
人等皆輪流派此船之人值班聽差下班仍
以船爲家不准在岸居住副參遊督陣三板
各一號悉如之

第八條副將營制戰船四十三號內長龍船二
號三板船四十號督陣大三板船一號參將

營制戰船三十三號內長龍船二號三板船
三十號督陣大三板船一號遊擊營制戰船
二十三號內長龍船二號三板船二十號督
陣大三板船一號其雖係遊擊營制而用船
三十三號者惟岳州漢陽二營凡專立之營
皆以都司二員管駕長龍爲領哨其各散哨
員弁均受約束左領哨專管本營錢糧右領

哨專管本營船廠軍裝及一切差遣巡查諸
務其三板之以守備充哨官者爲副領哨每
守備率領船十號

第九條副將營督陣三板船一號兵二十名長
龍船二號每船二十五人共兵五十名三板
船四十號每船十四人共兵五百六十名彙
書書識十四名共額兵六百三十名共哨官

四十三員參將營督陣三板船一號兵二十
名長龍船二號每船二十五人共兵五十名
三板船三十號每船十四人共兵四百二十
名共額兵四百九十名共哨官三十三員遊
擊營督陣三板船一號兵二十名長龍船二
號每船二十五人共兵五十名三板船二十
號每船十四人共兵二百八十名共額兵三

百五十名共哨官二十三員其遊擊營亦有
用三十三船者全做參將營之例彙書書識
均不在內

第十條領哨都司除長龍戰船一號有兵外另
給無兵之三板船一號如遇出兵入小河港
汊恐長龍遲滯則由長龍撥兵歸此三板乘
坐領哨出隊以期便捷

第十一條提督用橐書四名書識八名總兵用
橐書二名書識六名副參遊皆用橐書二名
書識四名都司用橐書一名書識二名守備
用書識二名千把各用書識一名

第十二條咸豐四年初立水師之時較陸軍勇
糧稍減槩手每月三兩六錢柁工四兩五錢
頭工四兩二錢不等厥後因銀價日賤米價

日貴槩手加爲三兩九錢今將水勇改爲額
兵而各處陸營紛紛招勇若遽將水兵口糧
大減則人皆去爲陸勇誰復肯當水兵自應
酌量暫從其優長龍戰船額設兵二十五名
內舵工兵一名每月給銀三兩六錢每日一
錢二分管艙兵一名頭工兵一名礮手兵四
名每月給銀三兩每日一錢槩手兵十八名

每月給銀二兩七錢每日九分三板戰船額
設兵十四名內柁工兵一名頭工兵一名礮
手兵二名槳手兵十名督陣大三板額設兵
二十名柁工兵一名頭工兵一名礮手兵二
名槳手兵十六名月餉均與長龍戰船同稟
書與柁糧同月支三兩六錢書識與槳糧同
月支二兩七錢俟軍務大定各路並無招勇

之事再由長江提督江楚總督專案具奏議
將口糧酌減乃爲定額亦須優於陸兵庶不
至似綠營之廢弛

第十三條長江水師副將營協標哨官額缺應
設都司二缺守備三缺千總十缺把總十二
缺外委十六缺參將營哨官額缺應設都司
二缺守備二缺千總八缺把總九缺外委十

二缺遊擊營哨官額缺應設都司二缺守備
一缺千總四缺把總六缺外委十缺以上各
營哨官皆以各員所管之船爲缺不設衙署
第十四條提督給坐船四號總兵給坐船三號
副參遊給坐船二號各營哨官都司守備以
下直至外委皆無衙署每哨各給坐船一號
以抵陸營衙署馬匹之費提督每坐船月支

價銀十六兩總兵副參遊每坐船月支價銀
十四兩都守以下每坐船月支價銀十二兩
第十五條哨官缺出都守千把外委五項應全
歸長江提督主政卽就長江水師中選員題
補其營官缺出副參遊三項擬以七成歸長
江水師中題補以三成由兵部就各省水師
中推補至總兵缺出由長江提督兩江總督

湖廣總督三人各保堪勝人員平日開單保
奏居時恭候

特旨簡放

第十六條長江水師上下五千里分防五省若
向五處藩庫領餉分歸五省報銷殊覺散漫
無紀戶部難於稽考而各省入款出款俱有
常額若添此項兵餉殊覺籌畫維艱查沿江

釐卡皆係水師恢復之地水軍歷年口糧多
取諸此今長江旣立經制水師酌定永遠章
程凡俸廉糧餉船廠子藥一切費用應酌留
釐卡數處在兩江境內者歸江甯鹽道經收
在兩湖境內者歸武昌鹽道經收每年居發
餉之時其在楚境各營造冊呈明湖廣總督
長江提督赴武昌鹽道庫支領其在江境各

營造冊呈明兩江總督長江提督赴江甯鹽道庫支領江楚兩總督每年各自具本題銷不彙入各省藩庫奏銷案內以免牽混

第十七條長江水師礮位大者千餘斤次者亦數百斤所需子藥最多須常設子藥局以資操演而備不虞查湖北省城安徽省城造藥均有牛碾最爲穩便該二省應各設火藥局

常川製造江蘇江西應辦硝斤協濟安徽藥局湖南應辦硝斤協濟湖北藥局至生鐵產於湖南應在長沙設立子彈局常川製造封門大子熟鐵羣子分解湖北安徽兩省所有楚境各營均赴武昌請領子藥江境各營均赴安慶請領子藥至三局造辦子藥之費由武昌江甯兩鹽道庫於釐金項下撥給

第十八條長江戰船大礮震驚最易朽壞議定
每屆三年修理一次十二年卽行更換應於
湖北之漢陽江西之吳城江南之草鞋夾三
處各設船廠排定子丑寅卯年分某年應修
整某營某哨之船某年應更換某營某哨之
船輪流興工江境兩廠由兩江總督暨長江
提督委員監修楚境一廠由湖廣總督暨長

江提督委員監修所有船廠經費亦由江甯
鹽道武昌鹽道兩庫撥給其風篷一件三年
卽須更換一次桿索纜緯等物每屆修整之
年亦須酌量添換均在船廠請領

第十九條長江戰船並無竹篷木艚惟以布棚
遮避雨露霜雪名曰雨棚最易朽腐又如鉤
本腦索纜繩旗幟紅油白油等項均須時常

修換不能待三年之期亦不能赴船廠請領
此五者名曰雜費酌定長龍戰船每年發銀
六十兩三板戰船每年發銀四十兩交該哨
官採辦修飭以壯軍容江境之船由江甯鹽
道發給楚境之船由武昌鹽道發給

第二十條提督現擬文武兼用其養廉應卽加
重每年支銀八千兩其餘俸薪蔬菜燭炭心

紅紙張等項均照陸營提督之例支給自總
兵以下直至千把凡養廉俸薪蔬菜燭炭心
紅紙張等項均照陸營之例發給外委准食
柁糧雙分仍每年支養廉銀十八兩惟陸營
之例馬改爲水師之坐船其水師官兵應領
之米照各省綠營陸兵定例每人日支八合
亦由江甯鹽道武昌鹽道兩衙門於釐卡項

下購米按季支發以上子藥局船廠雜費廉
俸兵米四條均彙入正餉案內題銷

第二十一條長江水師舊日營規甚嚴近來日
就鬆懈今立爲經制水師應申明定規三條
決不可犯者一曰不許登岸居住二曰不許
吸食洋煙三曰不許賭博如有登岸居住吸
食洋煙者官則革職兵則革糧有犯賭者由

該管將領察覈情形稟明嚴辦

第二十二條現在髮逆肅清長江水師各分汛
地專以驅逐游匪嚴防劫盜爲重儘有水盜
划船劫搶巨案逾限不獲由長江提督專案
奏劾不得以陸營尙未開案文員尙未開案
稍涉推諉遲延以重江防而絕盜風

第二十三條長江水師旣設立營汛待部議覆

准後卽須補放實缺查軍興十餘載水師員
弁所保官階提鎮居多副參遊亦不少所設
營缺有限應以保舉較大之階借補較小之
缺由臣等會同長江提督開單奏補其現在
勇丁營制俟部議覆准後應卽陸續遣撤一
俟勇營撤畢卽照新定兵丁餉章發給

第二十四條長江水師各有汛地不得私離且

長龍三板均係官物非同私物可以借用凡
各省文武出差人員雖有緊急公務非奉有
長江提督及五省督撫專札派坐戰船者不
得私借戰船乘坐以圖便易違者照不應馳
驛妄行馳驛例議處各營哨官非奉有專札
而以戰船私借客官及朋友乘坐者照私離
汎地例議處

第二十五條修造戰船式樣長龍底長四丈一尺底中寬五尺四寸三板底長二丈九尺底中寬三尺二寸督陣三板略加長大長龍設大礮前後左右六位三板設大礮前後兩位左右設車轉小礮兩位小槍短刀長矛噴筒隨宜配用

第二十六條狼山鎮總兵改歸長江提督管轄

該處江寬百餘里洪濤浩瀚海風不測長龍三板船身太小有風卽不能出港狼鎮所轄均係洋面近來甯釣沙船帶有礮位槍械每以捕盜爲名趁風行劫擬每營造大三板二十號並造大船數號如紅單拖罟式樣多安礮位巡緝內洋以壯聲威又擬造輪船數號分布狼山崇明等處於江海防務更資得力

第二十七條礮船爲江中利器可以禦暴亦可
以爲暴如准商民私造礮船則強盜亦可造
礮船以行劫鹽梟亦可造礮船以護私假名
僞託萬難稽查此後旣立長江經制水師應
將民間私造礮船一概禁革雖文武官員亦
不准私設礮船以杜奸民影射難於稽查如
有私立礮船不立時稟報者惟該汛之水師

是問至巡緝私鹽本以礮船爲最便然亦祇准於瓜州漢陽兩鎮標下奏派戰船若干號巡緝某處其未經奏派之戰船概不准干預鹽務尤不准包庇私鹽如有包庇者由兩江總督湖廣總督嚴行叅辦

第二十八條提鎮暨副參遊駐紮之處均須設立衙署軍裝局其經費卽取諸酌留釐卡一

俟部議覆准卽由臣等會同江楚總督長江
提督派員勘估次第建造事竣覈實報銷

第二十九條江南之京口狼山等營江西之湖
口營湖北之漢陽營湖南之岳州等營凡向
有水師之名而無礮船之實者今各該處均
立標營改從新章應悉歸長江水師提督節
制以昭畫一其向無水師名目者不必更改

第三十條水師以使船爲第一義善放礮次之

凡考槳糧須令一人駕一小划渡江一兩次

凡考礮糧須令連放五礮無走火遲鈍等弊

凡考應升應補之缺須令數船於無風之日

盪槳逆行三十里驗其遲速其哨官仍考試

技藝以定等差至校各鎮之優劣每年春季

長江提督會同兩湖總督調集岳州漢陽二

標在於武昌江面或武漢各湖簡閱一次秋季會同兩江總督調集湖口太平瓜州狼山四標在於黃天蕩等處簡閱一次閱畢會摺具奏優者酌量保獎劣者分別叅辦

長江水師營制二十四條

第一條岳州設立總兵設中軍中營遊擊用船三十三號倣參將營之例分防自陳陵磯起

至鹿角壘石瀘陵潭湘陰一帶

第二條沅江設立參將屬岳州鎮左營分防君
山西湖及常德龍陽華容等河出湖之處但
不進防內河其沅湘等水應由湖南另行設
防

第三條荊州設立副將屬岳州鎮後營分防自
荊州以下江面石首監利一帶至荊河口止

第四條陸溪口設立遊擊屬岳州鎮前營分防
自荆河口以下江面螺山新隄及倒口以內
之黃蓋湖

第五條彝洲設立參將屬漢陽鎮後營分防自
倒口以下江面至沌口止兼防金口以內之
斧頭湖

第六條漢陽設立總兵設中軍中營遊擊用船

三十三號倣參將營之例分防自沌口以下江面至團風止並防省城兩岸後湖青林等湖其漢水上通樊城一千餘里及各支河汊湖應由湖北另行設防

第七條巴河設立遊擊屬漢陽鎮右營分防自團風以下江面黃州蘭溪至道士洑止並防樊口以內之梁子湖

第八條田家鎮設立副將屬漢陽鎮前營分防
自道士袱以下江面津源口蘄州武穴至陸
家嘴止並防津源口及隆坪以內之湖

第九條湖口設立總兵設中軍中營遊擊分防
自陸家嘴以下江面九江十八號至老洲頭
止

第十條吳城設立參將屬湖口鎮左營分防自

湖口以內姑塘南康清磯一帶

第十一條饒州設立參將屬湖口鎮後營分防
都昌鄱陽康山一帶其彭蠡湖東通廣信樂
平浮梁各河南通省城贛江均由江西另行
設防

第十二條華陽鎮設立遊擊屬湖口鎮右營分
防自老洲頭以下彭澤香口至東流止並防

吉水溝以內各湖

第十三條安慶府設立副將屬湖口鎮前營分防自東流以下江面黃石磯李陽河一帶至縱陽止並防北岸鹽河及縱陽以內之湖南岸通殷家匯之河

第十四條大通設立參將屬提標後營分防自縱陽以下江面池州土橋一帶至荻港止

第十五條蕪湖設立遊擊屬提標右營分防自
荻港以下江面至裕溪口止並防灣沚青弋
江等內河

第十六條裕溪口設立參將屬提標左營分防
江面東西梁山至金柱關止並防運漕巢縣
無爲州各內河及巢湖百餘里

第十七條太平府設立提督衙署設中軍中營

副將分防金柱關以下江而至烏江止

第十八條金陵草輭夾設立參將屬提標前營
分防自烏江以下江面至通江集止並防江
浦六合之內河

第十九條瓜州設立總兵設中軍中營遊擊分
防自通江集以下江面至焦山止並防內河
至揚州止自揚州以上高郵寶應諸湖應由

卷之四 兵防
三
淮揚鎮總兵另行設防

第二十條孟河口設立遊擊屬瓜州鎮右營分
防南岸各夾江自焦山起至江陰口止其南
岸各內河應由松江提標另行設防

第二十一條三江營設立遊擊屬瓜州鎮左營
分防北岸各夾江自焦山起至靖江口止其
北岸各內河應由淮揚鎮標另行設防

第二十二條江陰設立副將屬瓜州鎮前營分
防自江陰口以下江面至鹿苑港止及常陰
壽星等沙其鹿苑港以下由福山鎮標接防
第二十三條狼山鎮總兵卽舊日所設者應添
設兩營水師兼隸長江水師提督管轄查狼
山鎮原統中左右三營鹽捕揚州三江泰州
泰興掘港六營共九營今擬一切悉仍其舊

惟於通州設一遊擊名曰綏通營分防自靖
江八圍港以下江面至通州止其船用長龍
二號督陣三板一號二十人之大三板十號
十四人之三板十號仍酌添紅單拖罟等船
第二十四條海門廳設立副將名曰綏海營分
防由狼山至海門一帶北岸江口海汊其船
隻用長龍二號督陣三板二號大三板二十

號仍酌添火輪船並紅單拖罟等船至崇明
一帶南岸海汊則歸江南提督分防

以上新設岳州鎮標四營漢陽鎮標四營湖
口鎮標五營提標五營瓜州鎮標四營添設
狼山鎮標二營共二十四營內副將六營參
將七營遊擊十一營奏入

上諭內閣曰官文曾國藩等奏會議長江水師營制

事宜著軍機大臣會同該衙門妥議具奏